



SAOPĆENJE ZA JAVNOST

Zloupotrebe budžetskih grantova **Sifet Durmiš* osuđen na godinu zatvora**

(Brčko, 30.10.2024. godine)

Tužilaštvo Brčko distrikta BiH okončalo je postupak po optužnici protiv Sifeta Durmiša (57), predsjednika udruženja "Spektar" Brka, kojom se tereti da je zloupotrebama budžetskih grantova, sebi i bliskim osobama pribavio imovinsku korist preko deset hiljada KM. Po okončanju još jednog antikorupcionog procesa u vezi sa zloupotrebama grantova iz budžeta Brčko distrikta BiH, Durmiš je kao odgovorno lice udruženja nepravosnažno osuđen na kaznu zatvora od jedne godine. Uz zatvorsku kaznu, njemu je izrečena mjera oduzimanja cjelokupne imovinske koristi i zabrana vršenja dužnosti u udruženjima građana i fondacijama na period od pet godina.

Optužnicom podignutom prošle godine, Durmišu je stavljeno na teret da je od početka 2019. do početka 2020. godine, postupajući u svojstvu odgovornog lica ovlaštenog za raspolaganje novčanim sredstvima udruženja Spektar i lica zaduženog za osiguranje zakonitosti rada, sredstva iz budžetskog granta dodijeljena za rad udruženja trošio u svoju i u korist trećih lica. On je optužen da je, iako je bio dužan da raspolaže i upravlja imovinom udruženja s dužnom pažnjom, na odgovoran i zakonit način, u najboljem interesu udruženja, iskoristio položaj tako što je protivno ciljevima udruženja svom sinu platio usluge koje nisu izvršene i zakupninu trećem licu za prostor koji uopće nije služio potrebama udruženja. Kako je navedeno u optužnici, nakon što je na račun udruženja po odluci Odjela za stručne i administrativne poslove Vlade isplaćen ukupan iznos od 15.000,00 KM na ime granta za redovan rad udruženja, svjestan da korištenjem novčanih sredstava protivno ciljevima udruženja pribavlja sebi i drugima imovinsku korist, što je i htio, on je iskoristio položaj pribavljanjem sebi i sinu ukupnog iznosa od 10.400,00 KM.

Tužilaštvo je optužilo Durmiša za teži oblik krivičnog djela Zloupotreba položaja ili ovlaštenja (iz člana 377 stav 2 Krivičnog zakona Brčko distrikta BiH), istovremeno predloživši sudu da mu oduzme imovinsku korist, te izrekne mjeru sigurnosti zabrane vršenja dužnosti odgovorne osobe u udruženjima i fondacijama na period od najmanje pet godina. Pošto je protiv njega potvrdio optužnicu, te održao glavni pretres, sud je donio nepravosnažnu presudu izrekavši optuženom kaznu zatvora od jedne godine i predloženu zabranu vršenja dužnosti. Usto, sud je prihvatio i prijedlog Tužilaštva da se od optuženog oduzme cjelokupna imovinska koristi pribavljena krivičnim djelom. Jednako kao i Tužilaštvo, optuženi presudu može pobijati žalbom.

Tužilaštvo Brčko distrikta BiH među prvim je institucijama u zemlji koje su se blagovremeno, po službenoj dužnosti, uhvatile u koštac s anomalijama u trošenju budžetskih sredstava građana. Procesuiran je veliki broj osoba, a i dalje se provode intenzivne istražne radnje s ciljem prikupljanja dokaza o krivičnopravnim radnjama u vezi s nezakonitim trošenjem grantova. U ovoj specifičnoj oblasti korupcije, do sada je pred pravosuđem distrikta Brčko pravosnažno osuđeno petoro lica.

**Ovom objavom ne prejudicira se ishod krivičnog postupka i ne narušava princip presumpcije nevinosti. Svako se smatra nevinim dok se pravosnažnom presudom ne utvrdi njegova krivica.*

GLAVNI TUŽILAC

ZEKERIJA MUJKANović